



Te Kura Kaupapa Māori o
NGĀ MOKOPUNA

4 Te Awanui o Falkirk, Maraenui

Te Whanganui-a-Tara 6022

waea: 04 380 8966

Imēra: tari@tkkmmokopuna.school.nz

Pae tukutuku: www.tkkmmokopuna.school.nz

Pūrongo Tumuaki

Hui Kaihautū / Hui Whānau

#49/2026-27

17 Pipiri 2026

Kaupapa	Kōrero o te wā
Ngā Tamariki	Karekau he rerekētanga ki ngā kōrero nō te marama kua tahake, e 149 ngā tamariki kei tō tātou kura. Tāpiri atu ki te 149 ko te 29 kei Manawatū nā reira, a pepa nei, e 178 ngā tamariki kei te rārangi ingoa o Ngā Mokopuna i tēnei wā. Kia maumahara koutou e te whānau, hei te wahanga tuawhā, ka kōtahi anake te pōhiri mā ngā tamariki hou, ko te wiki tuatahi tērā.
Kura Hou	E ai ki a Holmes Construction Ltd: • Kei te kite atu tātou ngā pou rino kua whakatū ki te paraka tuarua • Kei te whakaritehia tonutia te paraka tuatahi • Hei te 10 o Hōngongoi (Hūrae) whakatakoto ai te papa raima mō tērā o ngā paraka (wiki tuatahi o ngā hararei tērā - e 50 ngā taraka!) • Hei te wiki whai muri (17/07/26) ko te papa tuarua (topping slab) ka whakatakotohia • Ka mutu te site manager (Joe Bannerton) hei te 29 o Pipiri, he tangata hou kua timata ki tōna taha.
Whare Tapere	Whai muri i te haerenga ki Whakaoriori i te 04/06/26 ki te kite te Whare Tapere o Kuranui, anei ētahi anō whakaaro. • Me whai pakitara piki mā ngā tamariki • Me whai whakaaro mō tētahi tari mā ngā kaiako hākinakina, hauora • Whakarahi ake te rūmā hiki maitai hei akomanga hoki • Me whai tonu i te MoE, mā rātou ngā mea katoa e utu • Ko te korenga o te tōkeketanga i roto i ngā tau te take nui
Te Karapu Poti o Te Puna a Tara - He kaupapa tiaki taiao moana	Kei te rapu tonu i tētahi tangata ki te tiaki me te arahi i te kaupapa o te Karapu Poti o Te Puna a Tara (Worser Bay Yacht Club). E whā ngā wahanga o te whanga e whakawhanake ana e te karapu, te kaunihera a rohe me te kaunihera o Pōneke anō hoki. I roto i aua wāhi e whā, e iwa ngā momo mahi rerekē kua whakaritea. Ko Whaea Kath Haines kei te Ohu Whakahaere o te kaupapa nei heoi, kei te rapu kaitiaki nō te whānau ki te arahi i a tātou mō te roanga o tēnei kaupapa. Ko koe tēnā? Mehemea ae, whakapā mai ki a au.
He take pūtea	E toru wiki i mua, i ara mai tētahi take pūtea i kaha werongia a tātou tukanga whakahaere pūtea kāōre anō kia kite i mua atu. Kia mōhio te whānau, nā te pīngore o a tātou tukanga whakahaere pūtea, i tutuki pai ai te kaupapa nei heoi, he nui te māharahara mō tētahi wā.
Mahi tahi me VUW (Ratonga mātai hinengaro)	Kei te rangahau mātou i tētahi āheinga kua ara mai kia mahi ngātahi tātou te kura otirā, ngā whānau o te kura, me te wahanga mātai hinengaro o te Whare Wānanga o Te Herenga Waka, hei painga mā ngā tamariki. Nā te nui o te utu ki te whai aromatawai mātai hinengaro mā ngā tamariki, ko te whakaaro ia ka tukuna ngā tamariki (me te whānau) ki te ratonga kāhui mātai hinengaro o VUW,

	mā rātou te tamaiti e aromātaihia. Tuatahi, ka iti iho te utu, tuarua, ko te kura ka kawē tērā utu. He aha te kī e te whānau? Me whai tonu, kahore rānei?
Te kura hei wāhi pōti?	Ae rānei, kāo rānei me tū te kura hei wāhi pōti mō te pōtitanga a motu ka tū hei te Whiringa a Nuku e kainamu mai nei? Kua tae mai tētahi tokorua ki te whakamārama mai ētahi āhuatanga hei whakaarotanga mā tātou e te whānau. Me wawe tā tātou whakatau i tēnei pō tonu. Ko tā te Kaihautū taunaki, me whakaae tātou.
Taupānga AI	Kua kitea tētahi tauira o tētahi kaupapa here e hāngai ana ki te whakamahinga o ngā taupānga AI mā ngā ākonga, ā, ka tuari atu ki a koutou te whānau. A tēnā, koutou e mōhio ana mō ēnei tūmomo kaupapa, pānuitia, kōrerotia - he painga o roto mā tātou, he aha rānei? Kua kitea kētia e ngā kaiako wharekura e whakamahia ana e ētahi o ngā tamariki Wharekura heoi anō, kāore anō tātou te whānau kia kōrerotia. He aha ō koutou whakaaro? Ko te manako ia, ka āhei tātou tēnei te whakatau hei te Hui Whānau o te marama e tū mai nei.
Kaupapa Kai 2027	Kātahi anō te kāwanatanga ka whakaū te tahua pūtea mō ngā kai ki rō kura mō te tau e tū mai nei heoi anō, me aha tātou whai muri atu? He pai mehemea ka tīmata tēnei kaupapa te whakaaro ake kia matapakihia ngā kōwhiringa rautaki ma tātou haere ake. Mā tātou anō ngā kai e whakarite? Mā tētahi o te whānau rānei tēnei mahi? Me whakakahore rānei?
E Kainamu Mai Nei	
Ngā Pūrongo	Ka rite ngā pūrongo tamariki mō te haurua tau hei te paunga o te wahanga nei. Ka kōrerotia ngā pūkenga kei tō tamaiti, ngā kaupapa kua oti i a ia me te aho matua. Me he matea, he ngoikoretanga, he hiahia rānei ōnā, ka kōrerotia ērā hei whainga māna, otirā mā tātou mō te wahanga e whai ake nei. Kia mōhio koutou mātua mā, ka kore a Ngā Mokopuna e whai poka noa i ngā tohutohu a te kāwanatanga mō te āhua o ngā pūrongo me ngā aheinga a ngā tamariki. Ko ia kaiako e kōhi whakaaturanga, taunakitanga hoki e pā ki ia tamaiti me tana whanaketanga i roto i āna nei mahi.
Rangahau Pitomata	I te tau 2023 i whakahaerehia e tātou tētahi rangahau a whānau e hāngai ana ki te nui, ki te iti rānei o te 'pitomata' o te kura me te whānau e whakatutuki ana i taua wā. I mahia ki tētahi o ngā wānanga aho matua o taua tau nā reira he ōpaki rawa te mahi me ngā kitenga. Heoi anō, he kitenga. Ko te hiahia ia, kia whakahaere tātou i tētahi anō rangahau pērā e ōkawa ake te kawenga. Ko tētahi tino whakaawenga o tēnei rangahu ko te mōhio mehemea kei te ara tika tā tātou mahere a tau, otirā tā tātou mahere rautaki, kāore rānei.
Rangahau Kapa Haka	Tēnā koutou te whānau i whakaaetia te tono rangahau a Mihirangi Kōhatu ki te kōrero ki ētahi tamariki, ki ētahi whānau hoki e pā ana ki te kapa haka hei rautaki ako i ngā tikanga me ngā tukanga a kui mā, a koro mā. Akuni ia hoki mai ai ki Aotearoa mō āna hararei raumati, ā, ka uiui ia ētahi o a koutou tamariki. He rauemi kua tukuna mai e ia hei hōatu ki a koutou ngā whānau.
Nō nā tata nei	
Manu Kōrero a Rohe	He rawe te tū a ngā tamariki i haere ki te Whakataetae Manu Kōrero i tērā atu wiki. I tuatoru a Chyles Heffernan rāua ko Owaka Black, ngā teina, ā, i tuarua a Kahuti Hook rāua ko Hina Kororia Te Ahuru, nga tūākana. Ka nui te mihi ki a rātou katoa.

Reta ki te Minita	Kei te tatari tonu kia whai whakautu tātou ki te reta i tukuna ki te Miniata mō ngā take Mātauranga i terā marama e pā ana ki te whenua kei 11 Ventnor, te pupuri tonu i te whare Murirangawhenua hei kōhanga reo me te pupuri tonu i Paraka N (akomanga a Whaea Gina rāua ko Matua Lewis). Kīhai te MoE i whakaae ki ngā kaupapa e toru.
Hōtaka HauWai Tautāwhi Tamariki	Ekene pea ka kitea i tētahi tangata hei kaitiaki mō ēnei mahi ma tātou. Ko te manako ia ka ahei te whakatairanga atu ki te whānau hei ngā wiki tata nei. He whakaraupapatanga mahi kua whakaritea e TRN mō te tūranga nei heoi, kei a tātou te mana ki te whakatau he aha āna tino mahi. He wānanga whakangungu ka tū hei te wiki e tū mai nei.
Whakamaumahara noa	
Kaitiaki mō ngā tamariki (haerenga a kura)	Ko tā te kura kaupapa here e pā ana ki ngā kaitiaki mō ngā haerenga a kura: 1. Mo ia tamaiti e whitu tau te pakeke heke iho rānei me 1:1 (kotahi te kaitiaki mō ia tamaiti) 2. Me 18 tau, pakeke atu rānei te kaitiaki 3. He pai kē atu mehemea he tangata kōrero Māori te kaitiaki 4. Ki te kore he tangata reo Māori, me mōhio te kaitiaki kia kaua ia e kōrero Pākehā i te taha o ngā tamariki. 5. Kaore e whakaaetia mehemea ko tētahi kaiako he kaitiaki - māna ngā tamariki katoa e manaaki, e arahi i roto i ngā mahi akoako, māna te tirohanga whānui. 6. Ki te kore e taea he kaitiaki, me noho kāinga tō tamaiti. Kua roa tēnei kaupapa here e mana ana e hoa mā heoi, ko ētahi whānau kāore tonu i te whai.
Ngā waea pūkoro	Ki te kawae waea pūkoro mai tō tamaiti ki te kura, me mau atu tērā ki te tari i tana taenga atu ki te kura. Kāore e whakaaetia ngā waea i ngā haora kura nā reira karekau he take kia mau i a rātou tā rātou waea. Mehemea ka mau tō tamaiti e whakamahia ana i tana waea - mo te hara tuatahi ka ngaro mō te rā. Mō te hara tuarua ka ngaro mō te wiki. Mo te hara tuatoru, ngā ngaro mō te wahanga! Ka mutu, ka whakahokia te waea ki tētahi mātua.
Ngā whakairo	Ko te whakaaro ia i tēnei wā, kia whakairihia ngā whakairo o Murirangawhenua hei pare i runga i ngā kuaha ki te Whare Tapere. He aha ō koutou whakaaro?
Te kōrerotia o te reo Māori	He kāhui tamariki [toko iti nei] he kaha nō rātou ki te kōrero Pākehā. Kia kaha koutou otirā tātou, tō tātou taiao reo Māori te tiaki. Hei te wiki e tū mai nei ka karanga hui ahau ki ngā mātua o aua tamariki ki te rongu he aha pea hei mahi mā mātou ki te āwhina i a koutou ngā whānau kia ū pai ki te reo Māori.
E haere ana	
Wānanga Waiata me ...	Kei te haere ēnei wānanga ki te ako waiata mā te whānau. He whakaritenga tēnei ki te tautoko i ngā akoranga a ngā tamariki, mō te whakatūwheratanga o tō tātou kura hou anō hoki. Ka haere ēnei wānanga mō te roanga o te tau.
ngā tono mō te hōro	Ka mutu te wānanga e hoa mā, me mahi tahi tonu ki te whakapai i te kura kia rite mō te rangi kura whai muri atu. Tuarua, kaore i te tika ki te tuku i ngā tamariki ki tētahi akomanga mehemea karekau he pakeke kei tō rātou taha. Ahakoa ko wai, ahakoa hoki te kaupapa, ki te hiahia tētahi o te whānau ki te whakamahi te hōro, me whakakī i tētahi pepa tono. Kei a Whaea Julaine ngā pepa tono. Me kōrero hoki mehemea kei te pirangitia i tētahi akomanga hei

	tautoko i tō kaupapa. Heoi anō, ka hoi ki te kōrero o runga ake - ki te whakamahi koe i tētahi akomanga: (1) kua e rawekehia ngā taputapu me ngā rauemi o tērā akomanga (2) ka mutu te kaupapa, whakatikaina, whakapaipai hoki terā akomanga.
Counselling Services (Kaimātai Hinengaro)	Kua timata anō ngā mahi a Whaea Mary-Jane Duffy hei kaimātai hinengaro, mā ngā tamariki, mā ngā whānau anō hoki, nō Kōwhai Therapeutics ia. Ki te pirangi tētahi whānau ki a ia mō tētahi tamaiti kura tuatahi, wharekura rānei, whakapā mai. Karekau he utu ki tētahi whānau mō tēnei mahi, ko te kura ka utua. He pūtea kua tonoa mai e Te Rūnanga Nui o nga KKM o Aotearoa mō tēnei tū momo mahi.
11 Ventnor	Ko tā māua ko Matua Reece Kōhatu inaianei, ko te whai i a Ngāti Tama, nō rātou tērā whenua. Ko te manako ia ka whakaae rātou kia āhei te MoE ērā whenua te rīhi hei kāinga mō tō tātou kōhanga reo.
Tirohanga Whakamua	
Rā mutunga 11/12/2026	Ko te rā whakamutunga o te tau mō ngā tamariki ko te 11 o Hakihea. Hei te rā whakamutunga, ka tuku mihi ki ngā whare tawhito. He karakia, he mihi, he poro poroaki. Ka mutu, ka kai tahi tātou hei te 11am. Ka kore e kitea anō i ēnei whare tawhito! Ka timata hei te 9am, ka mutu te kura hei te pouputanga o te rā (12pm).
Wiki Hākinakina 13-18/12/2026	Ko te Wiki Hākinakina mā ngā tamariki wharekura o ngā KKM aho matua o te motu ka tū ki Heretaunga hei te wiki whakamutunga o te tau. Ko tā tātou tira ka noho ki TKKM o Te Ara Hou, Ahuriri. Ka noho tahi me TKKM o Te Rito heoi, ka tū motuhake e ia kura. Ka wehe i te ata o te Rātapu (13/12). Ka hoki hei te 18/12.
Wehenga Tahi 2027	Ka tino rerekē te tīmatanga o te tau kura 2027! Ka kore tātou e hoki mai ki kōnei tae ki wā ka whakatuwherangia ngā whare hou. Kei te rapu rautaki mātou i tēnei wā tonu. Hōmai o koutou whakaaro!

Taunakitanga: Kia whakaaehia te pūrongo.

Nāku noa

Dr Rāwiri Wright
Tumuaki